

Is toigh le diofar bheathaichean uisge pìosan eadar-dhealaichte den abhainn — an t-uisge blàth, eu-domhainn; an t-uisge fuar, domhainn; uisge sèimh, ciùin, no uisge garbh a tha a' gluasad gu luath. Faodaidh iad falach, brìeadh agus ithe an-seo.

Tha an reaban beag biodach a' snàmh ann an cliathan faisg air uachdar uisge eu-domhainn far a bheil iad ag ithe meanbh-fhrìdean agus lìonanach. Tha droighein bhiorach air druim a' ghòbhlachain agus tha mullach a' chuirp dorcha gus am bith e air fhalach nas fheàrr air grunn an uillt.


Bithidh ghòbhlachain fireann a' dèanamh an neadan de lusan uisge 's a' tarraing iasg boireann. Tha iad an uair sin a' cur ruaig oirre nuair a tha i air na h-uighean a bhreith. Bithidh e an uair sin a' dìon na nid bho bheathach sam bith a thig na còir.

G Thoir lion bheag leat gu allt no linne a tha faisg ort agus faic a bheil reabain no ghòbhlachain an-sin.

'S e fìor iasgair a th' anns a' chorra-ghrìtheach eireachdail. Bithidh i a' seasamh air a casan fada ann an uisge eu-domhainn. Tha a h-amhaich fhada agus a gob biorach, geur gu math freagarrach airson a bhith a' glacadh meanbh-fhrìdean, losgann agus iasg nach eil faiceallach agus a thig ro fhaisg oirre.

Tha an dòbhran fìor mhath air snàmh agus air iasgach. Glacaidh e maorach, meanbh-fhrìdean, agus uaireannan eòin bheaga agus beathaichean beaga eile. Is e beathach diùid a th' ann agus 's fheàrr leis gluasad timcheall air an oidhche. Mar as tric 's e an salchar aige air clachan anns an abhainn agus a lorgan anns a' pholl na soighnichean gu bheil dòbhran mun cuairt.

G Dè na soighnichean agus lorgan bheathaichean eile a dh'aithnicheas tu? An urrainn dhut cumadh plasd a dhèanamh de na lorgan sin?



corra - ghrìtheach



lorgan dòbhrain

